

Pigo, il cudesch, è quà

Il verm da Conrad Cavigilli en format grond

■ (abc) Dapi l'avust 1997 cumpara en La Quotidiana la rubrica «Pigo, il verm». Il cartoon sin la davosa pagina è daventà in element marcant da la giasetta dal di rumantscha. Il «bab» da Pigo, il geolog e graficher Conrad Cavigilli da Castrisch, ha ussa edì ina collecziun dals dissegns cumparids. Adina puspè haja el udi da gliued che taglia ora e che rimnia ils cartoons da Pigo. Conrad Cavigilli, il dissegnader e creader da la figura divertenta, ha ristgà da realisar l'idea d'ina ediziun en furma da cudesch. I n'è betg daventà in cudesch gross e voluminus. «Pigo, il verm» è ina publicaziun modesta e satiglia cun cuntegn original.

En tge idiom?

Gia la cuverta en quater colurs dat en îgl. Bliers crajan da vesair en Pigo insatge auter. Nagins faus patratgs, îgl è mo Pigo. Sin 160 paginas ed en il format A5 vegn unicamain Pigo a pled. Mo el

commentescha tut, nagin auter. Da bunamain 400 cartoons cumparids en La Quotidiana ha il bab da Pigo selecziunà ils pli ironics, ils pli satirics, ils pli bels, ils pli divertents. «Cler, ils gusts èn differents, mo mintga pagina ha in element che stà per sai», di Conrad Cavigilli. Suenten il text introductiv dal charedatur da La Quotidiana, Martin Cabalzar, dastgan ins giudair mintga pagina.

Îgl è propi in cudesch unic en la Rumantschia. En tge idiom è il nov cudesch da Pigo? Îgl è evident e cler: – e tut sa entant quai – Pigo sa drizza a tuttas Rumantschas e Rumantschs. Il cumpagnet discura mo rumantsch grischun. La Lia rumantscha e la Uniun rumantsch grischun han alura era renconuschì la prestaziun da Cavigilli. Quellas duas instituziuns han, ensemen cun trais auters sponsurs, gidà a realisar l'idea.

Quel da la Ligia Grischa

Cartoons e caricaturas datti fitg

bliers. Ina figura uschè originala e genuina sco Pigo è senza dubi singulara. Cun umor, ironia e mintgatant en furma sarcastica vegn Pigo e sia famiglia a pled.

Il cartoon renumà da la Ligia Grischa è represchentà en format grond, alura il Pigo che ha fatg ils pli bliers gols da chau, il Pigo sin ina marca da posta da 90 raps e 156 auters cartoons. Per La Quotidiana saja quai stà in cletg da fruntar sin Conrad Cavigilli che haja schendrà in cartoon original e genuin, net e stget rumantsch, scriva Martin Cabalzar en l'introducziun tar il cudeschet. Il cudesch da Pigo vegn preschentà ufficialmain, sonda ils 20 da november 1999 a Glion. Tuttas amias ed amis da Pigo, gronds e pitschens, èn invidads da sa participar a quella occurrenza en il Museum Regional.

«Pigo, il verm» retschaivan ins tar las librerias: Condrau Mustér, Maggi Glion, Palantin Cuira, Wega San Murezzan sco era tar la Lia rumantscha Cuira.



Quest maletg da frunt dal nov cudesch da Pigo è en quater colurs.